

# Ngwuja'ri ngwanni ngwullu je Bulij Titüj Äni kitabanu

Titüj gwuru dikirijin diru damal ngwuru diji diru Garany. Gwapaar Bulij gwe yiuru ndi ondaci ngwüjü ngwuja'ri ngwanni ngwujaw (2 Küründüj 7.6–7; Galatiya 2.3). Titüj gwaju ngwaalu giyaanu ngwani Kirid ndi ge'te ngwüjü aar ru yi'ra yidi yi'doonga yidi Ngwaalu. A be Bulij ülliji ngwuja'ri ngwee ngwudiwayiniyi yi'ral ye yibüpinä nda je diji diru gi'ra gidi gi'doonga gidi Ngwaalu äti, na ndi ari yiru ange yanni yading je enggaci ngwikirijinä ngwuru yimaadanu rung rung.

Bulij gwülädi Titüjüng ndi ondaci ngwikirijinä aar adatalu aar gäbici garnating na ü'ri'tidänü ki'doonga gidi Ngwaalu. Ngwugirinya Titüjüng 'to gwani ngwoorta ngwuru ngwu'duru ngwanni ngwududiya ngwüjü ngwonyadu ngwuja'ri ngwe ngwanni ngwä'tüdi 'didanu. Ngwuja'ri ngwe'te ngwanni ngwuru gora ngwügwä'ri'täji je Bulijalu ngwuja'ranu ngwee ngwullung je ku, ngwani “Ärrü yi'ral yanni yijaw.” Ngwondaci Titüjüng ngwulenge ndi ari a eelle gwüngün ru gora gijaw ngwikirijin ngwu'ter aar gwuji.

## **Yajang yidi ngwuja'ri**

1. Äni ngwuja'ranu na aganni Titüjüng (1.1–4)

2. Ola gwani lanni liru yi'ra yidi gi'doonga (1.5-16)
3. Yiiru yidi diji de'te de'te ki'du ki'doonga gidi Ngwaalu (2.1-15)
4. Ärrä yi'ral yanni yijaw (3.1-11)
5. Mi'rä gwudi aganni (3.12-15)

<sup>1</sup> Ngwuja'ri ngwee ngwändi 'dünggüny äny gwani Bulij gwuru dinäd nyi ru doo'ra dükäjäär didi Yicu Kirictu lükäjäny ndi gataji ngwüjü düwä ndi ämnä Ngwaalu ngwanni ngwäbrä je Ngwaalu. Na ndi nje enggaci aar bebere giyi'ral yanni yiru 'didanu yanni yati nje apada gidrü didi Ngwaalu.

<sup>2</sup> Ämnä Ngwaalu nggwee na bebere nggwee nggwo ndi ge'taji gwudi midi gwudi gwur'taling, gwanni gwaru gwe Ngwaalu ngwanni ngwä'tüdi di'duru, 'tu'tu anaku ädi gu gajalu.

<sup>3</sup> Na gwani gege'te gwe yaji ngwapa ngwuja'ri ngwüngün ngwuje 'täjälü giburalu ondaji gwe ngwuja'ri ngwanni ngwujaw ngwätädäär nje ükäji gwe gwudi Ngwaalu gwuru Gilang gwege.

<sup>4</sup> Ngwükäci nje Titüjüng gwuru giji güny 'didanu ämnä gwe Ngwaalu gwege.

Ara gu yimi'rü na adatalu ji gwudi Ngwaalu gwuru Papa na Yicu Kirictu gwuru Gilang gwege.

### *Yiiru yidi Titüj ngwaalu ngwani Kirid*

<sup>5</sup> Yi'ral yanni yigäbiciny nga be gatana ngwaalu ngwani Kirid, gwani Titüj, yiru ndi ari nga gege'te yi'ral mama yanni ya'ti medana nga

ge'te mbumbung je giyi'doonga yidi Ngwaalu giyündär 'dar anaku enggaca gu.

<sup>6</sup> A mbumbu ru gwanni gwujaw nono, ngwuru dur didi daw de'te pu, a yiji yüngün ru yanni yämnä Ngwaalu aa'ti ya ye ngwüji ondaji ndi ari yiki drü aar nyurtanu.

<sup>7</sup> Anni ätäädäär dangida yiiru yidi Ngwaalu, ngwube ru diji danni jaw nono, aa'ti da piyi ligo'ro lüngün, ngwu're ngwäy. Aa'ti da ru diji dati rläli, ngwuru däärä, aa'ti da übiji bilenganu gwudi yu'ram.

<sup>8</sup> Ngwube ru diji didi yirnü, ngwämni yi'ral yanni yijaw, ngwümäätä ligo'ro lüngün, ngwüdünälü, ngwuju'ri, ngwujayi drü.

<sup>9</sup> Ngwümätinälü 'di'däny ngwuja'ri gwanni ngwädi 'didanu anaku enggacaar je gu, nunnu ngwäti yiima ngwor'temaji ngwüjü ngwu'ter ngwuja'ri ngwe ngwändi kayalu nunnu aar dünäji ngwüjü gwanni ngwübinä ngwuja'ralu gwanni ngwändi kayalu.

<sup>10</sup> Ndi ari gilo lonyadu linyurtanu, lati dudiyi ngwüjü ngwuja'ri ngwe ngwuru 'tur, gwece gwece ngindenga lanni lati ari a ngwüji ü'ri'täni.

<sup>11</sup> Längitäjär je ngwünyü gwudi ngwulem ngwegen, ndi ari ngwuja'ri ngwe ngwegen ngwuma geraji ngwüjälü 'dar giyubanu ngwuja'ri ngwe ngwegen gwanni ngwa'ti indi kayalu nunnu aar gu bila giyu'ram.

<sup>12</sup> Dijir de'te degen dondaju ngwari, "Ngwüji gwudi Kiriding ngwuru ngwu'duru giyomon-  
alu 'dar, ngwuru nono ngwäng gwudi pooring  
ngwuki drü, aar ru ngworony, aar ubi ngwa-  
manu."

<sup>13</sup> Ngwuja'ri ngwee ngwaru ngwe dijir degen ngwäti ngwäyanü. Yäy gu no, rimiti je gwälü gwulleny, nunnu a änni Ngwaalu gwegen ele kayalu

<sup>14</sup> aa'ti la ji ndi geraci lütülütü gwudi dimürä didi Ngwüyäwüd ngwäni na ngwuja'ri ngwudi ngwüji ngwanni ngwati obe ngwuja'ri gora ge ngwanni ngwuru 'didanu.

<sup>15</sup> Ngwüji ngwanni ngwuju'ru, ngwong 'dar ngwuju'ru 'denggen, a be ngwüji ngwanni ngwuki ngwa'ti ämnä Ngwaalu, ya'ti yere yiju'ru 'denggen. 'Didanu, ya'rany na yigor yegen yiki.

<sup>16</sup> Ngindenga lati ari lilingidi Ngwaalinga, a be yiiru yegen inggidi ndi ari ngwa'ti aar je lingidi. Ndi ari ngindenga liki ngwüjü ngwäy, linyurtanu la'ti ädi giyi'ral yere yanni yijaw.

## 2

### *A ngwikirjün eelle ealleng gwändi kayalu*

<sup>1</sup> A be nga, enggaci ngwüjü ngwuja'ri ngwanni gwändi kayalu.

<sup>2</sup> Enggaca ngwuru ngwanni ngwupana ndi ari aar bebere, aar je denya, aar määtä yigo'ro yegen, aar ru ngwüji ngwämnä Ngwaalu, aar äti ämning, aar äti or'temajing gwanni gwändi kayalu.

<sup>3</sup> Nga enggaci ngwayu 'to ngwanni ngwupana aar eelle ealleng gwudi denya, aa'ti ngwa ari ngwulem, aa'ti ngwa äbräji ndi iyī aar ru ngwinäd ngwudi rläli, aar be inggidi yi'ral yanni yijaw.

<sup>4</sup> Aar ola ngwayu ngwanni ngwü'di'rälü nunnu aar änni ngwuru ngwegen aar änni yijü yegen, <sup>5</sup> aar määtä yigo'ro yegen, aar ju'ri, aar arngani ngwu'dun ngwe ngwegen, aar jayi yiguri, aar 'dengenaci ngwuru ngwegen nunnu aa'ti yere ya ji yanni yadi gäbici ngwuja'ri ngwudi Ngwaalu a je ngwüjü calu mireny.

<sup>6</sup> Üladi ngwamal 'to aar määtä yigo'ro yegen.

<sup>7</sup> Giyi'ral 'dar nga ru gora gegen ärrü gwe yi'ral yanni yijaw. Dünälü nga arri 'didanu ndi enggaci gwunga.

<sup>8</sup> A ngwuja'ri ngwunga ele kayalu aa'ti ngwa ke ngwüjü ngwäy, nunnu aar gäbici güwänü gunga a yaaru ape nunnu ya'ti yere ya aar ye ari 'dengge.

<sup>9</sup> Enggaca ngwänädä aar 'dengenaci ngworta ngwegen giyi'ral 'dar, aar je äpiji yiiru yanni yadi je gäbici aar jayanu, aa'ti la aar le garnati,

<sup>10</sup> aa'ti la aar je iyada yu'rimi, aar be inggidi ndi ari liru yigor 'didanu ndi aar je ännäci. Nunnu kay gere 'dar, aar gäbici enggacing ngwüjü gwani Ngwaalu ngwuru Gilang gwege, ngwujayi ngwokta ngwüjü.

<sup>11</sup> Ndi ari Ngwaalu ngwuma 'täjä yimi'rälü yanni yadi ye ngwüji g'ilängidini 'dar.

<sup>12</sup> Yati nje enggaci ndi ari ar inyini giyi'ral 'dar yanni yä'tüdi drü didi Ngwaalu, ar gatani yamila yidi didlä, ar elelle elelleng gwudi määtä lingina, gwudi dünälü, na ar elelle drü de didi Ngwaalu gididlänü ndee.

<sup>13</sup> Anni jicar ge'tajingalu gwudi jayanu nunnu ngwü'tädälü, ila gwudi näji gwudi Ngwaalu ngwupa na Gilang gwege gwani Yicu Kirictu.

<sup>14</sup> Nginde gwanni gwayu gwani alanga nunnu aar nje ü'rälü giyi'ral 'dar yanni yiki. Aar nje ju'riyi nono aar nje ruji ngwüjü ngwüngün jücü ngwiti je yigoranu ndi ärrü yi'ral yanni yijaw.

<sup>15</sup> Yäy yi'ral yiru giyee yanni ya je enggaci ngwüjü. Or'temaja je, a ngwe rimalu yeleny ye yunga 'dar. Aa'ti diji dere da ang calu mireny.

### 3

#### *Elle gwudi dikirjin*

<sup>1</sup> Diwayiniya ngwengga ndi ari aar 'dengenaci ngwelenya, a lanni lati ruyi yelenya aar je 'dengenaci, aar ji 'di'däny ndi ärrü yi'ral yanni yijaw.

<sup>2</sup> Aa'ti la lo diju dere ngwuja'ri ngwe gwanni ngwuki a be adatalu ji, a ätäjidi gu'ru ji, a jili ji 'didanu ngwüji 'dar.

<sup>3</sup> Ndi ari gwerre 'to a liru ngwe'rr ar nyurtanu, aar nje dudiyi, aar nje yamil na ami'ra 'dar ruji ngwinäd. Ar ru ngwu'rinya, ar ru ngwü'düny, a nje ngwüji ke ngwäy ar kajidi ngwäy.

<sup>4</sup> A be anni ma jayi liguri gwudi Ngwaalu ngwuru Gilang gwege na änni gwüngün gwanni gwänni nggwe ngwüjü 'tädalü,

<sup>5</sup> ngwuminje be gilängidiyi. Gwa'ti nje gilängidiyā gwani dünälü gwere gwärrär, aar be ani inä gwüngün. Ngwuminje be gilängidiyi uyi gwe keng gwege gwani lingini mana gwanni gwuyang aar nje gwä'räjälü liyang Lig'i'rim le

<sup>6</sup> lanni Liju'ru lanni lima aar nje bäljä nono Yicu Kirictu gwe gwuru Gilang gwege.

<sup>7</sup> Nunnu anni ma aar nje düniyälü yimi'rü ye yüngün, gwuma ar le emadi giyu'rinanu na ndi ge'taji gwudi midi gwudi gwur'taling.

<sup>8</sup> Ngwuja'ri ngwee ngwuru 'didanu. A ng-gwubupanga nga pälü ngwuja'ri ngwe ngwee, nunnu a ngwüji undi ngwäy ngwanni ngwuma änni Ngwaalu aar arngani yigo'ro yegen aar je ge'taji ndi ärrü yi'ral yanni yijaw. Yi'ral giyee yijaw aar ru bile gwudi ngwüji 'dar.

<sup>9</sup> Nga be gatani garnating gwudi ye'rr na ngwuja'ri ngwani utiti ngwügürnä ngwüriny, garnati na kadadi giyobo yidi Ngwüyäwüd, ndi ari yi'ral giyee yati 'ti apu bileng gwere aar be ru 'tur.

<sup>10</sup> Gwanni gwati dugidiyi ngwüjü, girinyädi gwene nga o're nga girinya mana. Nga be gäbici aa'ti gwa gwe apajidi yi'ral yere.

<sup>11</sup> Nga gwa gu lenge ndi ari diji danni diru gu no, didudu dima ke, dima obalu ligo'ro le lüngün.

### *Ngwuja'ri ngwudi mi'ra*

<sup>12</sup> Manari nggwuma ang ükacä Artemajing walla Tiyakuj no, aa'ti be nga gwerne ndi nyi ilija puprang kündär gani Nikupulij. Ndi ari äny gwuma ari nggwa ji ngenone digo de.

<sup>13</sup> Ju 'di'däny giyi'ral 'dar nga gataji Jinajing düwä gwanni gwurucida na Abulujing gidilä degen nga je ombaji ndi ari gilo limbuju yi'ral 'dar yanni yibupaar je.

<sup>14</sup> Lanni gilo lacajidar le, aar lenge ndi gwuji yiiru yanni yijaw aar ye gataji ngwüjü düwä

ngwanni ngwa'ti äti nunnu aa'ti elelle gwegen  
gwa ru gwudi yami'ri.

<sup>15</sup> Lanni gilo nyii le ngene 'dar, lagannaga.  
Aganna ngwumaada ngwege ndi änni Ngwaalu.  
A yimi'rü ji 'danggalu 'dar.



**Laro Bible (Bible)**  
**Laro NT**

copyright © 2020 Wycliffe Bible Translators, Inc.

Language: (Laro)

Contributor: ECS Diocese of Khartoum Translation Department

This text box needs to have content for PT9 to upload is to the DBL.  
All rights reserved.

2020-11-19

---

PDF generated using Haiola and XeLaTeX on 25 Aug 2024 from source  
files dated 29 Jan 2022

80c639f7-4569-5ffa-a77d-5df4c223631f